



Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq. (Sulinermut ilanngaat, akissarsiat Politiets Efterretningstjenestemik immikkut kukkunersiunermit ilaasut aamma soraarnerussutisiaqalernissaq siunertaralugu ileqqaakkat akileraaruserneqannginnerat)

(Aningaasaqarnermut Nunanilu Avannarlerni suleqatigiinnermut Naalakkersuisoq)

Partii Naleraq siunnersuummut imatut naatsumik oqaaseqarniarpoq.

Partii Naleraq sinnerlugu nuannaarutigisarpaput politikkerput ersarissoq, pissakinnerit akunnattumillu isertitallit nunatta ineriartorneranut peqataatinniartaratsigit.

Naak mittarfissuit iluaqutigisussaangikkaluarlugit akilersueqataanissaat ukiorpassuarni tulliuuttuni pisussangorpoq. Soorlu nittartakkatigit aammalu mobilimik atuinikkut akilersueqataasussaassallutik, sineriammi sumiluunniit najugaqaraluarunik.

Taamaammat tunngaviatigit isumaqataanarpoq sulinermit ilanngaateqarnissaq. Qularnanngitsumik ilaasa isornartorsiussavaat qaammammut 400kr suunnginnerarlugu aammalu ukiumut isertitakkaat aamma iluaquseritariaqartut, taamaamallu saqqummiussat kisitsisit naammaginagit.

Isornartorsiugassarput unaanngilaq qaammammut 400kr suunnginnera, tamanna nalunngilarput inuppasuarnut naleqassasoq. Annertunerutikkusunnera qularnanngitsumik amerlanerit isumaqatigissagaluarpaa aamma.

Partii Naleqqamiit pissusissamisoorinngilarput sulinermit ilaanngaati isikkumisut saqqummiunneqarnera. Suli ersarissumik taaneqarsinnaanngilarluunniit iluaqutissartai suunersut, sunniutissartai qulakkeerneqarsinnaanatik.

Siorna eqqartorneqarnerani ersarissumik nalunaarutigineqarnikuugaluarpoq sulinermit ilanngaasiorniaraanni, akileraartarnermut IT-mut atortorissaarutaat naleqqussartariaqassasut, nutaavinnik taarserneqarlutik.

Maanna suli tamanna pisimanngitsoq ersareqaaq, sulinermit ilanngaat aatsaat sulisimanerup ukiuata tulliani augustimi iluaqutissartaa naatsorsuutigisinnaagaanni. Piareersimasimangillat eqqunnissaanut.

Ataasiaannarata aqusaassavarput allannguitinniarluni allaffissornikkut piareersimannginneq.

Kisianni soorlu siorna kaammattuut, suliffeqarfiit sinneqartoorutaanik akilereerutit apparnissaanut, suli qisuariarfigineqarsimanngilarluunniit. Maannalu sulinermit ilanngaat naalakkersuisut isumaqatigiissuteqarfitillu suliaat takusinnaalerparput, aammalu taanna suliarinerlunneqarsimaqaaq.



Taamaammat aperisariaqarpugut ilumut allaffissornikkut piareersimangiinnartoqarsimava, imaluunniit sullarlunneruinnarpa?

Politikkikkut piumassuseq nukiusaraluartoq, ilaatigut maanna takusinnaavarput aamma allaffissornersuup kingupiluisa ilaat. Allanguisinnaannginneq.

Ila qiviarussiuk ilumorsinnaanngilaq sulinermit ilanngaaticut siunnersuutaasoq, qaammat suliffiusoq iluaqutissartaa pisinnaanagu. Ukioq ataaseq affarlu tungaanut aatsaat qaangiuppat 4.000kr tigusinnaallugu.

Isornartorsiugassat ilagilluinnaramikku qaammammut 400kr neriorsuutigineqanngimmat, kisianni ukiukkaarlugit 4.000kr sinnilaarlugit utertoortarnissaq.

Sulinermit ilanngaat kajumissaarutaasussaavoq, utertoortissaanani!

Sulinermit ilanngaat 2020-mi sulisartunut iluaqutissatut atuutilersinnaannginnera aallaavigalugu allaffissornersuaq pilersinneqartussaq akerlilerlugu siunnersuutip isikkumisut itigartipparput Partii Naleqqamiit.

Naalakkersuisut allanguinissamut piareerpata, qilanaaraarput siunnersuummik saqqummeeqqinnissaannut allaffissornikkut pisarissersuutaanngitsumik.

Partii Naleqqamiit siunnersuutip imarisaata sinneri aningaasaqarnermut ataatsimiititaliamut ingerlateqqippagut, sukumiisumik eqqartugassanngorlugit qilanaarivarput suleqataaffiginissaat.

Qujanaq